

Mr. sc. Nikola Pržulj, dipl. inž. geod.



Iz plejade geodetskih veterana zauvijek je otišao u 89. god. nakon duge i teške bolesti kolega, drug, prijatelj i vrsni stručnjak mr. sc. Nikola-Nidžo Pržulj, dipl. inž. geod. Rođen je 21. 7. 1933. godine u Dobrom Polju, opština Kalinovik, u kući koja se nalazi na samom raskršću puteva koji vode u Sarajevo, Foču i Kalinovik. U Sarajevu završava II. gimnaziju 1955. godine kada kao stipendista NR BiH započinje studij na Geodetskom fakultetu u Beogradu. Nakon prve godine prelazi na AGG fakultet u Zagreb gdje diplomira 1961. godine. Na istom fakultetu odbranio je 19. 3. 1979. godine magistarski rad „Prilog ispitivanju manjih gradskih mreža na postojeću triangulaciju“. Sa diplomom drugog stepena i zvanjem dipl. inž. geod. zaposlio se u RGU NR BiH. Kada je 1. 1. 1962. godine formiran Geodetski zavod kao samostalna ustanova iz operative RGU Nikola i većina radnika je prešla u novo formirani Zavod. Skoplje je 1963. godine pogodio razorni zemljotres pa je pokojni Nikola poslan ispred BiH da pomogne kao geodeta na što bržem oporavku od posljedica zemljotresa. U Skopju je upoznao buduću suprugu Olgu iste profesije. U Sarajevo su došli 1964. godine, a već narednu godinu su proveli na radovima novog premjera na teritoriji opštine Tuzla. Te godine pok. Nikola je učestvovao na mjerenju gradske triangulacije, prve u BiH. Godine 1972. prelazi u Republičku geodetsku upravu Bosne i Hercegovine, gdje je obavljao poslove inspektora za premjer. Šef grupe za osnovne radove i premjer u Sektoru za premjer i komasaciju postaje 1990. godine. U Upravi ostaje na radnom zadatku do 1994. godine, kada iz zdravstvenih razloga odlazi u prijevremenu penziju. Tokom 1960-ih i 1970-ih bio je angažovan u Višoj geodetskoj školi u Sarajevu kao vanjski saradnik u zvanju asistenta na predmetu Geodezija. Bio je i vanjski saradnik u nastavi na Odsjeku za geodeziju Građevinskog fakulteta Univerziteta u Sarajevu, nekoliko godina, kao asistent za predmete Državni premjer sa organizacijom rada i Melioracije.

Pokojnih Nikole i Olge ćemo se sjećati kao vrijednih, odgovornih, poštenih, društvenih i jednih od onih koji su gazili vrleti BiH, savjesno ispunjavali svoje zadatke i doprinosili da se novi premjer skoro privede kraju. Nema sumnje da su novi geodetski planovi i karte, na kojima su i njih dvoje učestvovali u izradi, doprinijeli bržem razvoju i prosperitetu naše zemlje.

Njihova djeca, sin Miloš i kćerka Tatjana kao i četvoro unučadi mogu se ponositi da su Nikola i Olga proveli dostojanstven i častan život.

Mnogobrojna porodica, prijatelji i kolege su se od Nikole oprostili na gradskom groblju Sv. Marko u Sarajevu, 7. 9. 2022. godine. Sahranjen je, po svojoj želji, pored svoje supruge Olge od koje smo se oprostili 2009. godine.

Neka im je lahka zemlja bosanska.

Mirsad Bakšić